

## صاهود بن زياد بن طواله

صاهود بن زياد بن طواله احد شيوخ الاسلام من شمر، اوردنا له هذه القصيدة والتي يناشد فيها الغار الضليل<sup>(١)</sup> عمن استضل فيه من الاجيال الماضية من قومه وخاصة الفرسان منهم.

لا ساح ظل الغار شببت به نار  
وقلّطت محماس على شف بالي

ابا انشدك بالله ياغار ياغار  
عن اللي قعد بك من قديم وتالي

ياما حضرت من القبائل والأدوار  
وياما مضى لك من عداد الليالي

وياما حكوا في فيّك فصل الأشوار  
وخيل تربط في جديد الحبالي

بطراف جالك مطبخ القدر وكتار  
وصحون تقلّط به سمان جلاللي

وشربوا بظلك دلة البن وهار  
اللي قديم يتبعون الدلاللي

برغش وسالم والمشاكيل وذعار  
حصن الرجال اللي تحصر الجمالي

---

(١) الغار - الكهف الضليل.

وكردى وفارس وضاري وافي الاشبار  
عي على العيان قوله بقالي

من شافهم يبحل بهم كل مختار  
زحزيع عن زحزيع ماضي الفعالي

من جا مجالسهم رغب يدلله الجار  
وتقصر يدين ماتنوشه نوالي

وليا خبط وسط العرب علم الانذار  
بنو بيوت كهن الجبالي

عقيلهم قامت تراود بالاشوار  
وجهيلهم ما خبطوا بالهبالى

عيال مناعير على قب ومهار  
مثل السحاب إلى تردم خيالي

طوال الخطا قطاعة البید وديار  
شيوخ الشيوخ اللي تهاب الرجالي

راحوا بدور تقل ياناس ماصار  
اللي من العدوان جابوا حلالى

